

Na osnovu odredbi Zakona o političkim organizacijama ("Službeni list SR BiH", broj: 27/91), člana 4. Odluke o osnivanju političke organizacije Narodni evropski savez BiH, osnivačka skupština političke organizacije NARODNI EVROPSKI SAVEZ BOSNE I HERCEGOVINE, na svome zasjedanju održanom u Sarajevu, dana 27.02.2021.godine, donosi

STATUT NARODNOG EVROPSKOG SAVEZA BOSNE I HERCEGOVINE

I. OPĆE ODREDBE

Član 1.

NARODNI EVROPSKI SAVEZ BOSNE I HERCEGOVINE je organizacija političkog centra, proevropski orijentiran, otvoren za sve građane Bosne i Hercegovine, čija su načela, ciljevi i organizacija utvrđeni Programom i Statutom.

Član 2.

Naziv političke organizacije je: NARODNI EVROPSKI SAVEZ BOSNE I HERCEGOVINE (u daljem tekstu: NES).

Skraćeni naziv političke organizacije je: NES BiH.

U skladu sa važećim propisima, naziv NES se može koristiti na jednom ili više stranih jezika.

Sjedište političke organizacije je u Sarajevu, ul. Obala Kulina bana br. 24/2.

Član 3.

NES djeluje na području države Bosne i Hercegovine, a u skladu sa odgovarajućim propisima i u inozemstvu.

Član 4.

NES ima svojstvo pravnog lica koje se stiče upisom kod nadležnog organa u skladu sa zakonima BiH.

Član 5.

NES predstavlja i zastupa Predsjednik stranke.

U slučaju odsutnosti ili spriječenosti Predsjednika stranke, NES predstavlja i zastupa Zamjenik predsjednika stranke, a u njegovoj odsutnosti ili spriječenosti Generalni sekretar, prema odluci Predsjedništva stranke.

Član 6.

NES ima pečat, znak (amblem), zastavu i svečanu pjesmu.

Pečat NES-a je okruglog oblika, u njegovom središtu je znak NES.

Puni naziv: NARODNI EVROPSKI SAVEZ BOSNE I HERCEGOVINE ispisan je u obodnome krugu.

Osim pečata iz stava 2. ovog člana pečat imaju i niži organi NES-a (gradske/općinske organizacije).

Pečat je okruglog oblika promjera 30 mm sa tekstom ispisanim u koncentričnim krugovima: "Narodni evropski savez BiH " i nazivom gradske/općinske organizacije u sredini.

Za potrebe rada NES može imati i druge pečate i štambilje.

Sadržaj pečata, broj pečata, davanje odobrenja za izradu pečata, upotreba pečata, način vođenja evidencije o izdatim pečatima, način uništenja i druga pitanja od značaja za izradu i korištenje pečata i štambilja uredit će se posebnom odlukom Predsjedništva stranke.

Odlukom Predsjedništva stranke utvrđuju se znak (amblem) i zastava NES-a.

Član 7.

NES i niže organizacione jedinice imaju prijemni štambilj koji se stavlja na sve akte primljene u stranci.

Štambilj je pravougaonog oblika, a sadrži znak, naziv stranke, oznaku za broj i datum, broj priloga i drugo po potrebi.

Član 8.

Bliže odredbe o izgledu i upotrebi pečata, štambilja, znaka (emblema) i zastave NES-a donosi Predsjedništvo stranke.

II. CILJEVI I NAČIN NJIHOVOG OSTVARIVANJA

Član 9.

NES se, u okviru demokratskog djelovanja, bori za ostvarenje svog Programa i svojih ciljeva pridobijanjem birača, učešćem na izborima i učešćem u radu predstavničkih i drugih tijela vlasti, srazmjerno svom uspjehu na slobodnim izborima.

Član 10.

Ciljevi NES-a su utvrđeni Programom NES-a, a obuhvataju posebno:

- očuvanje suvereniteta, nezavisnosti i cjelovitosti države Bosne i Hercegovine, kao i nepovredivosti njenih granica;
- vraćanje naziva Republika Bosna i Hercegovina;
- zalaganje za punopravno uključivanje Bosne i Hercegovine u Evropsku uniju i NATO, te druge evropske i svjetske organizacije;
- afirmaciju bosanskog identiteta kao zajedničkog identiteta svih građana Bosne i Hercegovine;
- afirmaciju i odbranu nacionalne samobitnosti kao i nesputan kulturni i svaki drugi razvoj svih naroda, nacionalnih i etničkih manjina u Bosni i Hercegovini;
- demokraciju u društvenom i političkom životu i funkcioniranje pravne države;
- afirmaciju ljudskih prava i sloboda;
- slobodu medija i nezavisnost javnih servisa;
- ravnopravnost spolova;

- borbu protiv korupcije i organizovanog kriminala;
- jedinstvo obrazovnog sistema u skladu sa evropskim standardima;
- jačanje poduzetničkog duha;
- vraćanje dostojanstva boračkoj populaciji kroz zapošljavanje i egzistencijalno zbrinjavanje;
- otklanjanje svih oblika diskriminacije;
- zagovaranje odgovornosti prema položaju najugroženijih dijelova bosanskohercegovačkog društva (djeca i starci, invalidi i bolesni, itd.);
- zaštita i unaprjeđenje životne sredine;
- slobodnu aktivnost vjerskih zajednica zasnovanu na autonomiji i vjerskim slobodama građana;
- dosljedno provođenje principa tržišne privrede, ravnopravnost svih oblika vlasništva, privatno poduzetništvo i ukidanje svojine bez vlasnika;
- odgoj i obrazovanje u skladu sa tradicijom i suvremenim potrebama bosanskohercegovačkog društva;
- unaprjeđivanje socijalnih prava;
- razvijanje saradnje i jačanje veza sa BH dijasporom, i
- afirmaciju mladih i njihovo uključivanje u javni i društveni život.

Načela i ciljevi NES-a navedeni u ovom članu Statuta bit će predstavljeni u programskim dokumentima, donesenim na nadležnim stranačkim organima.

Član 11.

NES može stupati u saveze s drugim političkim organizacijama, te postajati članicom bosanskohercegovačkih i inostranih asocijacija i to u skladu s bosanskohercegovačkim zakonima.

Odluku o saradnji donosi Predsjedništvo, na prijedlog Predsjednika Saveza.

Član 12.

NES može biti član međunarodnih političkih udruženja čije je djelovanje u skladu sa njenim programskim načelima i ciljevima.

Odluku o učlanjivanju donosi Predsjedništvo stranke, na prijedlog Predsjedništva.

Član 13.

Rad NES-a i njenih organa je javan.

Javnost rada ostvaruje se javnim djelovanjem i redovnim obavještanjem članstva i javnosti o svim bitnim pitanjima vezanim za rad NES-a.

Odnosi u NES-u se zasnivaju na principu demokratskog jedinstva, koji uključuje:

- poštivanje slobode mišljenja i slobode izražavanja unutar NES-a,
- uvažavanje odluka većine i obavezu njihovog ostvarivanja u praksi,
- prava manjine i svakog pojedinca da zadrži i u NES-u izražava vlastito mišljenje i gledišta, pod uslovom da nisu u suprotnosti sa programskim ciljevima, principima i ovim Statutom.

III. ČLANSTVO

Član 14.

Član NES-a može biti svaki punoljetni građanin Bosne i Hercegovine koji nije član druge političke partije.

Članstvo može biti :

- redovno i
- počasno.

Član 15.

Namjera volje pristupanja NES-u ozvaničava se potpisivanjem pristupnice.

Pristupnicu NES-u može potpisati svaki punoljetan i poslovno sposoban građanin koji prihvata Program i Statut NES-a, koji nije član druge političke organizacije i koji prihvata Etički kodeks NES-a.

Prilikom potpisivanja pristupnice NES-a svaki građanin može se pismeno izjasniti o namjeri da djeluje kao: simpatizer, član, prijatelj ili aktivista NES-a.

Član 16.

Pod simpatizerom NES-a u skladu sa Statutom podrazumijeva se svaka osoba koja podržava rad NES-a i predstavlja potencijalnog člana ili aktivistu NES-a, koji želi da bude blagovremeno upoznat sa aktivnostima NES-a, da bude pozivan na skupove, tribine, okrugle stolove i druge manifestacije i sastanke.

Član 17.

Član NES-a ima svoja prava i obaveze koje su definirane ovim Statutom i drugim aktima.

Prava člana su:

- da sudjeluje u odlučivanju o svim bitnim pitanjima za NES, neposredno ili preko izabranih predstavnika u organima NES-a,
- da bira i da bude biran u organe NES-a,
- da bude obaviješten o stanju i aktivnostima NES-a, njenih organa i tijela,
- da daje inicijative, prijedloge i mišljenja u vezi sa radom NES-a i aktuelnim društvenim pitanjima koja zahtijevaju angažman NES-a,
- da kod duže promjene boravišta (preko šest mjeseci) učestvuje u radu mjesnog ogranka NES-a na čijem se području nalazi (isključuje se pasivno biračko pravo u tom mjesnom ogranku),
- druga prava koja proizlaze iz prirode članstva.

Član 18.

Pod aktivistom NES-a u skladu sa ovim Statutom podrazumijeva se istaknuti član NES-a koji se pored prava definisanih u članu 17. ističe u svojim posebnim obavezama u afirmaciji programskih ciljeva NES-a.

Svi članovi organa NES-a po automatizmu su aktivisti i imaju posebna zaduženja.

Posebna lična zaduženja pobliže će utvrditi gradski/općinski odbor NES-a samoinicijativno ili na prijedlog mjesnih odbora NES-a.

Član 19.

Pod prijateljima NES-a podrazumijevaju se pravna i fizička lica koja podržavaju programske ciljeve NES-a, podržavaju i pomažu materijalno-tehničkom i organizacijskom jačanju NES-a ali zbog profesionalnih i drugih specifičnosti nisu u mogućnosti da aktivno djeluju kao članovi odnosno aktivisti NES-a.

Član 20.

NES može imati svoje počasne članove o čemu odluku donosi Predsjedništvo NES-a.

Počasnim članom može postati osoba koja u svom političkom djelovanju podržava ideje za koje se zalaže NES i koja je svojim javnim istupima i neposrednim djelovanjem promovirala i podržavala NES u zemlji i inostranstvu.

Počasni član NES-a može postati i osoba koja nije državljanin Bosne i Hercegovine.

O počasnim članovima vodi se poseban registar.

Počasni članovi NES-a imaju sva prava redovnih članova, osim prava da biraju i budu birani u skladu sa ovim Statutom.

Član 21.

Pristupnice se predaju mjesnom ogranku prema mjestu prebivališta budućeg člana NES-a.

Evidencija članstva u mjesnim ograncima je baza za uspostavljanje i praćenje jedinstvene centralne evidencije članstva u NES-u (Registar članova).

Jedinstveni centralni registar članstva vodi se u Stručnim službama NES-a.

Članovima NES-a se izdaje članska karta čiji izgled i sadržaj utvrđuje Predsjedništvo NES-a.

Član 22.

Pristupnica se dostavlja na potvrdu Gradskom/općinskom odboru NES-a, prema mjestu prebivališta novog člana NES-a koji će, ukoliko smatra da za to nema smetnji, potvrditi pristupnicu (verificirati pristupanje u NES-u), a odluku o tome dostaviti novom članu NES-a, pripadajućem mjesnom odboru te Stručnim službama radi uvođenja u Centralni registar.

Odluka kojom se odbija potvrditi pristupanje NES-u mora biti obrazložena, a razlozi za odbijanje mogu biti članstvo u drugoj političkoj organizaciji, moralni lik i djelovanje koje nije u skladu sa ciljevima i programskim načelima NES-a i slično.

Na odluku o odbijanju pristupnice, potpisnik pristupnice – budući član NES-a ima pravo prigovora u roku od 8 dana od dana prijema Odluke.

O prigovoru odlučuje Sud časti NES-a.

Odluka Suda časti je konačna i ne može se pobijati pred drugim organima NES-a.

Član 23.

Dužnosti člana NES-a su:

- da djeluje u skladu sa Programom, Statutom i drugim aktima NES-a,
- da se aktivno zalaže za ostvarivanje ciljeva NES-a,
- da u institucijama političkog sistema dosljedno zastupa programska opredjeljenja i stavove organa NES-a,
- da provodi odluke organa NES-a i
- da čuva i unaprjeđuje ugled NES-a.

Odgovornost članova NES-a reguliše se posebnim pravilnikom, koji donosi Predsjedništvo NES-a.

Član 24.

Članstvo u organima NES-a prestaje:

- istupom na vlastiti zahtjev,
- isključenjem iz organa NES-a zbog djelovanja suprotnog Programu i Statutu NES-a,
- smrću člana,
- kandidiranjem na izborima bez saglasnosti NES-a, i
- učlanjenjem u drugu stranku.

Članu ili aktivisti koji je isključen iz organa NES-a može se izreći privremena ili trajna mjera kandidiranja u organe NES-a ili izvršnu i zakonodavnu vlast ispred NES-a.

Član 25.

Nijedan član se ne može isključiti iz članstva NES-a bez opravdanog razloga.

Član 26.

Odluku o isključenju iz organa NES-a donosi gradski/općinski odbor NES-a samoinicijativno ili na obrazložen prijedlog mjesnog odbora NES-a kojemu član pripada.

Prije donošenja odluke omogućit će se članu NES-a, protiv koga se postupak vodi, da obrazloži svoja stajališta i podnese potrebne dokaze u svoju odbranu.

Odluku o isključenju iz članstva može donijeti i Predsjedništvo NES-a.

Protiv odluke o isključenju može se podnijeti žalba u roku od 15 dana od prijema odluke.

O žalbi odlučuje Sud časti NES-a čija je odluka konačna.

Na odluku Suda časti može se podnijeti zahtjev za reviziju iste Glavnom odboru u roku od 30 dana od dana donošenja.

Član NES-a ima pravo istupiti iz NES-a podnošenjem pisane izjave o istupanju. Izjava se podnosi gradskom/općinskom odboru NES-a.

IV. ORGANIZACIONA STRUKTURA I ORGANI

Član 27.

NES kao jedinstvena politička organizacija svoje političko djelovanje i aktivnosti ostvaruje putem:

- organa i tijela NES-a,
- teritorijalnih organizacija NES-a: mjesni odbori, gradska/općinska organizacija i regionalni odbor.

a) Organi i radna tijela NES-a

Član 28.

Organi NES-a su:

- Konvencija,
- Glavni odbor,
- Predsjednik,
- Predsjedništvo i
- Sud časti.

1. KONVENCIJA

Član 29.

Najviši organ NES-a je Konvencija.

Konvenciju čine delegati koji se biraju na izborima i delegati po položaju.

Delegati po položaju su:

- Predsjednik i zamjenik predsjednika,
- Članovi Glavnog odbora,
- Predsjedništvo,
- Generalni sekretar,
- predsjednici gradskih/općinskih odbora,
- predsjednici regionalnih odbora,
- izabrani predstavnici NES-a u gradskim/općinskim vijećima/skupštinama općina jedinica lokalne samouprave, općinski gradonačelnici/načelnici, te zastupnici/e u državnim, entitetskim i kantonalnim zakonodavnim tijelima,
- izabrani predstavnici/e lokalnih organizacija NES-a.

Delegat Konvencije na izborima biraju gradske/općinske organizacije nakon provedene kandidature na neposrednim izborima.

Broj delegata iz pojedinih gradskih/općinskih organizacija utvrđuje i potvrđuje Predsjedništvo NES-a na osnovu kriterija koji se temelje na izbornim rezultatima.

Član 30.

Konvencija NES-a vrši verifikaciju mandata delegatima Konvencije, bira Radno predsjedništvo Konvencije i donosi Poslovnik o radu Konvencije.

Konvencija punovažno odlučuje ako je prisutno više od 2/3 delegata Konvencije.

Konvencija donosi odluke većinom glasova prisutnih delegata Konvencije.

Izuzetno od odredaba prethodnog stava ovog člana, Konvencija dvotrećinskom većinom verifikovanih delegata donosi i mijenja Statut i Program rada NES-a.

Član 31.

Konvencija NES-a nadležana je da:

- usvaja i mijenja Statut,
- usvaja i mijenja Program rada i djelovanja NES-a,
- donosi odluke o prijedlozima upućenim Konvenciji,
- donosi smjernice i stavove za djelovanje organa i članova NES-a između dvije Konvencije,
- razmatra i ocjenjuje rad NES-a i njegovih organa između dvije Konvencije (Izveštaj o radu Predsjednika NES-a, Glavnog odbora i regionalnog odbora),
- bira i razrješava Predsjednika i zamjenika NES-a,
- bira i razrješava dio članova Glavnog odbora koji to nisu po položaju,
- donosi druge akte opšteg karaktera,
- razmatra i druga pitanja koja su od važnosti za uspješno djelovanje NES-a.

Član 32.

Konvencija može biti redovna i vanredna.

Odluku o sazivanju Konvencije donosi Glavni odbor na prijedlog Predsjednika stranke.

Odlukom Glavnog odbora utvrđuje se prijedlog dnevnog reda i osnovna pitanja pripreme i organizacije Konvencije NES-a.

Prijedloge dokumenata koje razmatra Konvencija NES-a utvrđuje Glavni odbor na prijedlog Predsjedništva stranke.

Konvenciju saziva i rukovodi njegovim radom Predsjednik i Predsjedništvo NES-a sve do izbora Radnog predsjedništva Konvencije.

Vanredna Konvencija se saziva na prijedlog Predsjedništva stranke.

Vanredna Konvencija saziva se kada Predsjedništvo stranke odluči da je to neophodno zbog izuzetnih prilika u državi Bosni i Hercegovini ili u NES-u.

Odluku o održavanju Vanredne Konvencije donosi Predsjedništvo stranke dvotrećinskom većinom od ukupnog broja članova.

Vanredna Konvencija mora se sazvati najkasnije tri sedmice prije njegovog održavanja.

Prijedlozi odluka i drugih dokumenata za Vanrednu Konvenciju dostavljaju se delegatima najmanje tri dana prije održavanja Konvencije.

Vanredna Konvencija radi po Poslovniku o radu redovne Konvencije.

2. GLAVNI ODBOR

Član 33.

Najviši organ Saveza između dvije sjednice Konvencije je Glavni odbor NES-a.

Član 34.

Glavni odbor:

- bira predsjednika i zamjenika predsjednika Glavnog odbora,
- brine o izvršavanju odluka Konvencije,
- daje političke ocjene i utvrđuje političke stavove NES-a na državnom, entitetskom i kantonalnom nivou,
- donosi opće akte NES-a,
- utvrđuje i imenuje ukupan broj članova regionalnog odbora.
- usvaja godišnji budžet i izvještaj o ostvarenju budžeta,
- usvaja planove i izvještaje o poslovnoj aktivnosti i politici NES-a,
- daje saglasnost o osnivanju odbora NES-a u inostranstvu,
- donosi odluku o osnivanju stručne službe, preduzeća, agencije ili drugih oblika obavljanja privredne djelatnosti, po potrebi osniva radna tijela za rješavanje pitanja iz svoje nadležnosti (komisije, savjeti i slično),
- ocjenjuje statutarnost akata i odluka organa NES-a, daje tumačenje Statuta NES-a,
- odlučuje i o drugim pitanjima vezanim za rad NES-a, koji Statutom ili drugim općim aktima nisu stavljeni u nadležnost drugim organima.

Član 35.

Glavni odbor čine članovi Predsjedništva, Zastupnici u Parlamentarnoj skupštini BiH, Parlamentarnoj skupštini FBiH, Narodnoj skupštini RS, Skupštini Brčko distrikta, Skupštini kantona, izabrani gradonačelnici i načelnici, Predsjednici gradskih/općinskih odbora, te po 15 delegata ispred svakog političkog subjekta.

Mandat Predsjedniku, zamjeniku i članovima Glavnog odbora traje 4 godine.

Mandat u Glavnom odboru nosiocima mandata ističe prestankom ili gubitkom mandata na državnom ili entitetskom nivou, odnosno nastupa početkom mandata na državnom ili entitetskom nivou.

Glavni odbor statutarne odluke donešene između dvije Konvencije podnosi na verifikaciju Konvenciji NES-a

Član 36.

Glavni odbor iz svog sastava bira predsjednika i zamjenika predsjednika Glavnog odbora.

Predsjednik priprema, saziva i vodi sjednice Glavnog odbora.

Predsjednik Glavnog odbora, u saradnji sa Predsjednikom i zamjenikom NES-a, Generalnim sekretarom i Predsjedništvom NES-a u cjelini, stara se o provođenju odluka Glavnog odbora. Zamjenik predsjednika Glavnog odbora mijenja predsjednika u slučaju njegove odsutnosti i/ili spriječenosti i obavlja druge poslove koje mu povjeri predsjednik Glavnog odbora u skladu sa Poslovníkom o radu.

Član 37.

Glavni odbor se saziva po potrebi.

Predsjednik Glavnog odbora će obavezno sazvati sjednicu Glavnog odbora kada to zatraži Predsjedništvo, najmanje 50% članova Glavnog odbora ili Predsjednik NES-a.

Član 38.

Između dva zasjedanja Konvencije, Glavni odbor može kooptirati odgovarajući broj članova radi popune upražnjenih mjesta.

Između dva zasjedanja Konvencije, Glavni odbor može donijeti Statutarnu Odluku o povećanju broja članova Glavnog odbora ukoliko za to postoji potreba zbog interesa NES-a, kao i druge Statutarne odluke na prijedlog predsjedništva.

Kooptiranje se vrši sa liste kandidata o kojoj se glasalo na Konvenciji i to verificiranjem mandata slijedećem kandidatu prema broju dobivenih glasova i tako redom sa područja i u diži liste na kojoj je došlo do promjene.

Ukoliko na listi nema drugih kandidata utvrdiće se novi prijedlozi kandidata.

3. PREDSJEDNIK NES-a

Član 39.

Prvobitnog Predsjednika i Zamjenika predsjednika NES-a bira osnivačka skupština, dok naknadne Predsjednike i Zamjenike predsjednika NES-a bira Konvencija NES-a.

Kandidat za Predsjednika NES-a može biti član NES-a koji podnese prijavu Izornoj komisiji NES-a koju podržava najmanje 50% članova aktuelnog saziva Glavnog odbora.

Kandidatsku listu sačinjava Izborna komisija NES-a, a nakon provedene procedure kandidiranja i ovjere kandidatura, što će se preciznije regulisati Pravilima izbornog postupka.

Izabran je kandidat koji dobije najveći broj glasova.

Član 40.

Predsjednik NES-a nadležan je da:

- predstavlja i zastupa NES,
- rukovodi NES-om i stara se o provođenju odluka Konvencije, Glavnog odbora i Predsjedništva,
- saziva, predsjedava i učestvuje u radu Predsjedništva te učestvuje u radu Glavnog odbora NES-a, sa pravom glasa,
- pokreće pred organima NES-a rješavanje političkih i drugih pitanja od važnosti za NES, njegove ciljeve i Program rada,
- koordinira rad svih organa NES-a i brine se o provođenju njihovih odluka, zaključaka i drugih akata,
- saziva i rukovodi Konvencijom NES-a do izbora njegovog rukovodstva,
- saziva konstituirajuću sjednicu Glavnog odbora i rukovodi njime do izbora rukovodstva Glavnog odbora,
- podnosi izvještaj o radu Konvenciji i informacije Glavnom odboru,

- donosi konačnu odluku o sastavu kompenzacijskih lista za sve nivoe izbora u BiH,
- ima pravo zaustaviti izvršenje odluke i/ili drugog akta organa NES-a-a na nižim nivoima, te odluke odbora i komisija NES-a i nosilaca funkcija u organima NES-a, za koje smatra da su u suprotnosti sa Statutom, Programom i drugim odlukama organa NES-a, a čija bi primjena nanijela štetu ugledu i/ili drugu štetu NES-u.
- obavlja druge poslove u skladu sa Statutom i drugim aktima NES-a, te poslove koje mu povjeri Konvencija, Glavni odbor i Predsjedništvo NES-a.

4. ZAMJENIK PREDSJEDNIKA NES-a

Član 41.

NES ima jednog Zamjenika predsjednika NES-a kojeg prvobitno bira osnivačka skupština a kasnije ga bira Konvencija između dva ili više kandidata.

Zamjenik predsjednika mijenja Predsjednika NES-a u slučaju njegove spriječenosti ili nemogućnosti da obavlja svoju funkciju i tada ima prava, ovlaštenja i odgovornosti predsjednika Saveza.

5. PREDSJEDNIŠTVO NES-a

Član 42.

Izvršno-politički organ NES-a je Predsjedništvo koje ukupno broji 15 (petnaest) članova od kojih su najmanje 3 (tri) člana žene.

Zamjenik predsjednika NES-a, Generalni sekretar, predsjednik Kluba poslanika u zakonodavnom tijelu države Bosne i Hercegovine su prema položaju članovi Predsjedništva.

Jedna trećina članova Predsjedništva popunjava se od strane Predsjedništva po prijedlogu Predsjednika NES-a.

Član 43.

Predsjedništvo Saveza:

- izvršava odluke i provodi stavove Konvencija i Glavnog odbora NES-a,
- utvrđuje nacрте odluka i drugih akata koje donosi Konvencija, prijedloge akata koje donosi Glavni odbor u okviru svojih ovlaštenja,
- provodi političku djelatnost na osnovu programa rada NES-a,
- vodi brigu i raspolaze imovinom NES-a u skladu sa Statutom i drugim općim aktima NES-a (donošenjem pojedinačnih ili općih odluka, zaduženja i sl.),
- prati realizaciju finansijskog plana,
- Predsjedništvo NES-a može donositi Odluke iz nadležnosti Glavnog odbora ukoliko postoji nemogućnost održavanja sjednice Glavnog odbora,
- razmatra i usvaja godišnji finansijski plan NES-a,
- razmatra i usvaja izvještaje o finansijskom poslovanju NES-a,
- donosi Pravilnik o organizaciji i sistematizaciji Stručnih službi NES-a,
- Pravilnik o materijalno- finansijskom poslovanju i druge opšte akte NES-a, za koje je ovlašten Statutom ili odlukom Glavnog odbora,
- donosi Pravilnik o ostvarivanju kadrovske politike i Smjernice kadrovske politike,
- imenuje Glavni izborni štab NES-a,
- donosi odluku o kandidatima za Predsjedništvo BiH, za parlamentarnu Skupštinu BiH, te za parlamente entiteta, predsjednika/potpredsjednike entiteta, mandataru i

- članove vlade na nivou države i entiteta, predsjednike domova parlamenata, predsjednike klubova poslanika, kao i predsjednika skupštine i premijera kantona,
- daje saglasnost na kandidatske liste za kantonalne skupštine,
 - daje saglasnost na kandidatske liste za lokalne izbore u Bosni i Hercegovini,
 - daje saglasnost za kandidate za načelnike i gradonačelnike,
 - donosi Poslovnik o radu,
 - formira svoja radna tijela u skladu sa Poslovnikom,
 - ima i druge nadležnosti utvrđene Statutom i drugim općim aktima, u okviru odluka i naloga Konvencije i Glavnog odbora NES-a.

Član 44.

Članovi Predsjedništva preuzimaju zaduženja po pojedinim oblastima i odgovorni su za praćenje i predlaganje politike NES-a u toj oblasti.

Odluku o zaduženju donosi Predsjedništvo na prijedlog Predsjednika NES-a.

Član 45.

Predsjedništvo NES-a posebnim odlukama uređuje osnivanje i donosi odluku o pokretanju i izdavanju glasila i drugih publikacija Saveza.

Na nižim nivoima, odluku o izdavanju glasila donose odgovarajući izvršni organi uz prethodnu saglasnost Predsjedništva NES-a.

6. SUD ČASTI

Član 46.

Sud časti rješava žalbe na odluke o izricanju mjera odgovornosti, kao i druge slučajeve koji su mu dati u nadležnost Statutom ili drugim općim aktom NES-a.

Sastoji se od predsjednika, zamjenika predsjednika i pet članova.

Radi u Vijeću od tri člana uključivši i predsjednika Vijeća.

Sastav Vijeća za svaki slučaj određuje predsjednik Suda časti.

U postupku pred Sudom časti shodno će se primijeniti odredbe općih propisa koje reguliraju utvrđivanje odgovornosti (npr. disciplinski postupak i sl.).

7. GENERALNI SEKRETAR

Član 47.

NES ima Generalnog sekretara kojeg na prijedlog Predsjednika NES-a, bira i razrješava Predsjedništvo NES-a.

Generalni sekretar NES-a je nadležan da:

- rukovodi Stručnom službom, brine o organizaciji rada i stručnom i operativnom izvršavanju poslova i zadataka NES-a,
- stara se o političkom i organizacionom jačanju i osposobljavanju organizacija i drugih oblika djelovanja NES-a,
- pomaže predsjednicima organa NES-a u sazivanju sjednica i organizaciji rada,
- brine se i odgovoran je za izvršavanje odluka Predsjedništva NES-a, Glavnog odbora NES-a i Regionalnog odbora,
- usklađuje rad opštinskih/gradskih organizacija,
- prema potrebi saziva koordinaciju izabranih dužnosnika NES-a,
- usklađuje rad savjeta i drugih oblika djelovanja organiziranih na nivou NES-a i brine se o obezbjeđenju materijalnih, finansijskih i tehničkih uslova za njihovo djelovanje,
- provodi zaključke Glavnog odbora u pogledu sticanja, čuvanja, zaštite i raspolaganja imovinom NES-a,
- obavlja i druge poslove u skladu sa Statutom NES-a i odlukama organa NES-a.

Generalni sekretar NES-a za svoj rad odgovara Predsjedništvu i Predsjedniku NES-a.

Za pojedine oblasti rada u NES-u imenuju se Izvršni sekretari.

Izvršne sekretare, na prijedlog Predsjednika NES-a, uz pribavljeno mišljenje Generalnog sekretara, imenuje Predsjedništvo NES-a.

8. STRUČNA SLUŽBA

Član 48.

Stručna služba NES-a je izvršno i stručno-operativno tijelo NES-a.

Radom Stručne službe NES-a rukovodi Generalni sekretar NES-a.

Član 49.

Organizacija i sistematizacija Stručne službe uređuje se Pravilnikom o organizaciji i sistematizaciji koji na prijedlog Generalnog sekretara donosi Predsjedništvo NES-a.

9. KOMISIJE SAVEZA

Član 50.

Radi odlučivanja u pojedinim oblastima ili proučavanja pojedinih pitanja i pripremanja prijedloga rješenja, Predsjedništvo NES-a može imenovati pojedine komisije.

Komisije se obrazuju od članova Predsjedništva i Glavnog odbora, a u njihov sastav mogu ući i drugi članovi NES-a.

10. FORUM MLADIH

Član 51.

Forum mladih je posebna organizacija mladih članova do 35. godina starosti.

Forum mladih svojim prisustvom na raznim tribinama, seminarima, debatama predstavlja NES, te svojim raspravama i idejama daje doprinos u jačanju i širenju ideje NES-a.

O svojim aktivnostima tokom godine, Forum mladih je dužan da dostavi godišnji izvještaj Predsjedniku NES-a.

b) Teritorijalna organizacija saveza

1. MJESNI ODBOR

Član 52.

Mjesni odbor je osnovna jedinica političkog organizovanja NES-a.

Mjesni odbor se formira na području mjesne zajednice grada/općine prema trenutnoj organizaciji gradova/općina u Bosni i Hercegovini.

Mjesni odbor se sastoji od:

- 5 članova, kad na teritoriji mjesne zajednice, u kojoj se formira mjesni odbor, ima do 100 aktivnih članova koji imaju prijavljeno prebivalište u mjesnoj zajednici,
- 7 članova, kad na teritoriji mjesne zajednice, u kojoj se formira mjesni odbor, ima od 101 do 500 aktivnih članova koji imaju prijavljeno prebivalište u mjesnoj zajednici,
- 9 članova, kad na teritoriji mjesne zajednice, u kojoj se formira mjesni odbor ima od 501 i više aktivnih članova koji imaju prijavljeno prebivalište u mjesnoj zajednici.

Jedan od članova mjesnog odbora je predsjednik koji se bira između članova mjesnog odbora većinom glasova.

Predsjednik mjesnog odbora rukovodi radom i vodi sjednice mjesnog odbora.

Članove mjesnog odbora biraju svi aktivni članovi NES-a koji imaju prijavljeno prebivalište u mjesnoj zajednici za koju se bira mjesni odbor.

Mjesni odbor je zadužen da promovise ideje NES-a na teritoriji mjesne zajednice, da radi na popunjavanju NES-a novim članovima, da provodi izbornu kampanju na teritoriji mjesne zajednice, da organizuje logističku podršku za posmatrače i praćenje regularnosti izbora na biračkim mjestima u svojoj mjesnoj zajednici.

Mjesni odbor je obavezan najmanje jednom u dva (2) mjeseca održavati sjednicu.

Članovima mjesnog odbora mandat može isteći prije roka u slučaju ako član izgubi status aktivnog člana NES-a.

2. GRADSKA/OPĆINSKA ORGANIZACIJA SAVEZA

Član 53.

Za područje svakog grada/općine obrazuje se jedna gradska/općinska organizacija NES-a ako imaju uspostavljena najmanje tri mjesna odbora.

Izuzetno, odlukom Predsjedništva NES-a, ako postoje opravdani razlozi, može se odobriti formiranje više organizacija sa ovlaštenjima gradske/općinske organizacije NES-a u jednom gradu/općini, uz obavezu formiranja organa za koordinaciju aktivnosti prema gradskim/općinskim (državnim) organima vlasti.

Član 54.

Članovi gradskog/općinskog odbora po automatizmu su načelnik, gradonačelnik, predsjedavajući gradskog/općinskog vijeća, odbornici/vijećnici i zastupnici na svim nivoima zakonodavne vlasti koji su na izborima dobili mandat, imenovani zvaničnici u izvršnoj vlasti na svim nivoima te predsjednici mjesnih odbora, a čije je mjesto prebivališta na području tog gradskog/općinskog odbora.

Jedan od članova gradskog/općinskog odbora je predsjednik koji dodatno može imenovati do deset članova gradskog/općinskog odbora.

Ukoliko stranka ima svoga načelnika/gradonačelnika izabranog na izborima, on je i predsjednik gradskog/općinskog odbora.

Gradski / općinski odbor je zadužen da kreira politiku stranke na teritoriji grada/općine.

Odgovoran je za organizaciju kampanje na teritoriji općine i organizaciju nadzora provedbe izbora, kao i prikupljanja rezultata izbora na nivou općine prema planu Stručne službe NES-a.

Odluke i stavovi gradskog/općinskog odbora su obavezujući za sve nosioce mandata u ime NES-a na gradskom/općinskom nivou.

Gradski/općinski odbor zasjeda jednom mjesečno.

Mandat članovima gradskog/općinskog odbora traje dvije (2) godine, a nosiocima mandata na gradskom/općinskom i ostalim nivoima vlasti, mandat u gradskom/općinskom odboru traje do kraja mandata u izvršnoj i zakonodavnoj vlasti.

Gradski odbor imenuje sekretara na period od četiri (4) godine.

Sekretar gradskog/općinskog odbora je zadužen da dostavlja sve materijale članovima/cama odbora, da vodi zapisnike sa sjednica gradskog / općinskog odbora, da sve izvještaje i zaključke sa sjednica odbora dostavlja Stručnoj službi NES-a, kao i da obavlja sve tehničke poslove koje mu naloži gradski/općinski odbor ili Stručna služba NES-a.

Članovima i Sekretaru gradskog/općinskog odbora mandat može isteći prije roka u slučaju ako član ili sekretar gradskog/općinskog odbora izgubi status aktivnog člana NES-a ili na zahtjev mjesnog odbora koji ga je delegirao u gradski/općinski odbor.

3. REGIONALNI ODBOR

Član 55.

Regionalni odbor po automatizmu čine Premijeri kantona, članovi kantonalnih skupština i Predsjednici općinskih odbora. Ukupan broj članova za pojedinu regiju utvrđuje i imenuje Glavni odbor.

Član 56.

Regionalni odbor iz svog sastava bira predsjednika i sekretara odbora.

Prvo se bira predsjednik odbora, zatim po potrebi zamjenik predsjednika, te sekretar odbora.

Član 57.

Regionalni odbor NES-a nadležan je da:

- utvrđuje prijedlog Programa rada NES-a za područje regije;
- provodi odluke, smjernice i druge akte viših organa NES-a;
- ostvaruje suradnju i partnerstvo sa drugim demokratskim Savezima, kao i ostalim organizacijama i udruženjima građana;
- podnosi izvještaj o svom radu Glavnom odboru;
- usvaja financijski plan i njegovo izvršenje za nivo regionalne organizacije;
- ima i druga ovlaštenja i odgovornosti u skladu sa programskim i drugim aktima NES-a;

Odluke regionalnog odbora su obavezne za gradske/općinske organizacije NES-a.

Kod glasanja primjenjuje se elektorski sistem glasanja na način, da predsjednik gradskog/općinskog odbora koji je član regionalnog odbora ima:

- jedan glas ako je u proteklim izborima ta gradska/općinska organizacija ostvarila izborni rezultat do 1.000 glasova NES-a,
- dva glasa ako je u proteklim izborima ta gradska/općinska organizacija ostvarila izborni rezultat od 1.001 do 2.000 glasova NES-a,
- tri glasa ako je u proteklim izborima ta gradska/općinska organizacija ostvarila izborni rezultat od 2.001 do 3.000 glasova NES-a,
- četiri glasa ako je u proteklim izborima ta gradska/općinska organizacija ostvarila izborni rezultat od 3.001 do 4.000 glasova NES-a,
- odnosno za svaku dodatnu hiljadu glasova ostvarenih na predhodnim izborima dodaje se po jedan glas.

Regionalni odbor saziva i njime predsjedava predsjednik regionalnog odbora.

Član 58.

Svaki regionalni odbor obuhvaća određenu regiju, i to :

Regija 1.

Velika Kladaša, Sanski Most, Ključ, Cazin, Bihać, Bosanska Krupa, Bosanski Petrovac, Bužim, Novi Grad, Prijedor, Oštra Luka, Krupa na Uni, Kozarska Dubica, Kostajnica, Prnjavor, Srbac, Gradiška, Laktaši, Istočni Drvar, Kupres RS, Šipovo, Ribnik, Petrovac, Mrkonjić Grad, Banja Luka, Jezero, Čelinac, Kotor Varoš, Kneževo.

Regija 2.

Odžak, Orašje, Domaljevac/Šamac, Doboj Istok, Gradačac, Gračanica, Lukavac, Srebrenik, Čelić, Tuzla, Banovići, Živinice, Teočak, Sapna, Kalesija, Kladanj, Brčko, Bijeljina, Ugljevik, Šamac, Pelagićevo, Donji Žabar, Lopare, Vlasenica, Zvornik, Šekovići, Srebrenica, Osmaci, Bratunac, Milići, Modriča, Vukosavlje, Brod, Derвента.

Regija 3.

Žepče, Zenica, Zavidovići, Usora, Doboj Jug, Maglaj, Tešanj, Visoko, Breza, Olovo, Kakanj, Vareš, Travnik, Vitez, Novi Travnik, Kreševo, Kiseljak, Jajce, Gornji Vakuf- Uskoplje, Fojnica, Donji Vakuf, Busovača, Bugojno, Dobretići, Teslić, Doboj, Petrovo, Stanari.

Regija 4.

Foča - Ustikolina FBiH, Goražde, Pale - Prača FBiH, Bileća, Ljubinje, Trebinje, Rudo, Novo Goražde, Nevesinje, Višegrad, Kalinovik, Gacko, Čajniče, Berkovići, Foča RS.

Regija 5.

Neum, Mostar, Stolac, Čapljina, Prozor-Rama, Konjic, Jablanica, Ravno, Čitluk, Ljubuški, Posušje, Grude, Široki Brijeg, Drvar, Glamoč, Kupres FBiH, Livno, Tomislavgrad, Bosansko Grahovo.

Regija 6.

Hadžići, Ilidža, Novi Grad Sarajevo, Trnovo FBiH, Ilijaš, Vogošća, Centar Sarajevo, Stari Grad Sarajevo, Novo Sarajevo, Trnovo RS, Han Pijesak, Istočna Ilidža, Istočni Stari Grad, Sokolac, Rogatica, Pale RS.

Član 59.

Za koordinaciju regionalnih odbora Predsjedništvo stranke može imenovati Koordinacioni odbor po prijedlogu Predsjednika stranke.

Koordinacioni odbor ima obavezu da u svom radu komunicira sa svim predsjednicima regionalnih odbora i svim nosiocima mandata na kantonalnom nivou, kako bi svoje usaglašene prijedloge dostavljali Glavnom odboru stranke na nadležnost.

4. ORGANIZACIJA BRČKO-DISTRIKT BOSNE I HERCEGOVINE

Član 60.

Za područje Brčko - Distrikt Bosne i Hercegovine organizuje se organizacija (ogranak) Saveza Brčko - Distrikt Bosne i Hercegovine.

Na organizaciju NES-a Brčko-Distrikt Bosne i Hercegovine (ovlaštenja, odgovornosti i odnosi sa centralnim organima NES-a) shodno se primjenjuju odredbe ovog Statuta koje se odnose na općinske i kantonalne, odnosno regionalne organizacije NES-a.

5. POVJERENIK I POVJERENIŠTVO

Član 61.

Predsjedništvo NES-a ima pravo razriješiti općinske/gradske organizacije u cjelini ili djelimično, kao i njihove pojedine članove, ako ocijeni da djeluju u suprotnosti sa Statutom,

Programom i drugim aktima i odlukama organa NES-a i time ugrožavaju ugled i nanose drugu štetu NES-u.

Kada ocijeni neophodnim, zbog naročito teške situacije u organizacijama NES-a, Predsjedništvo NES-a može raspustiti sve organe NES-a tog nivoa.

Koordinacioni odbor može Predsjedništvu NES-a predložiti razrješenje/raspuštanje organa općinske/gradske/organizacije.

Kada se razriješi neki odbor u cjelini, odnosno kada se raspusti, Predsjedništvo će imenovati povjerenika ili povjereništvo koje će voditi poslove razriješenog organa/raspuštene organizacije do novog izbora.

Protiv odluka može se podnijeti žalba Glavnom odboru u roku od 15 dana, koji je dužan na prvoj narednoj sjednici donijeti odluku po žalbi.

Žalbe iz prethodnog stava ne odlažu izvršenje, a odluke koje se donesu povodom tih žalbi su konačne.

Član 62.

Ukoliko, zbog opravdanih razloga u pojedinim općinskim organizacijama nije moguće provesti redovne izbore, Predsjedništvo NES-a za takve općinske organizacije imenuje povjereništvo sa mandatom od dvije godine, s tim što će u odluci o imenovanju povjereništva odrediti da će se provesti izbori kada se za to steknu uslovi i ukoliko do isteka tekućeg mandata nije ostalo više od dvije godine.

Predsjedništvo NES-a će Pravilima izbornog postupka bliže urediti uslove i procedure kandidovanja, postupak i proces glasanja, proceduru žalbenog postupka, prava i obaveze biračkih odbora, utvrđivanje biračkih mjesta, objavu rezultata izbora, dodjelu mandata, osiguranje nacionalne zastupljenosti, zastupljenosti mladih i žena, kao i druga pitanja od značaja za izbore u NES-u, a dužno ih je donijeti 30 dana od dana stupanja na snagu ovog Statuta.

V. KLUBOVI ZASTUPNIKA-VIJEĆNIKA-ODBORNIKA

Član 63.

U cilju uspješnijeg ostvarivanja programskih ciljeva NES-a u oblasti kulture, ekonomije, ekologije i drugim područjima organiziraju se klubovi NES-a na funkcionalnom principu.

Odlukom Predsjedništva NES-a bliže se uređuje organiziranje i rad klubova u okviru NES-a.

Član 64.

U predstavničkim tijelima (skupštinama/vijećima) izabrani predstavnici - poslanici/ odbornici odnosno vijećnici, izabrani na listi NES-a, formiraju klubove poslanika odnosno vijećnika/odbornika NES-a.

Predsjednika kluba poslanika, odnosno vijećnika/odbornika, biraju poslanici, odnosno vijećnici/odbornici između članova kluba, na prijedlog izvršnog organa odgovarajućeg nivoa organiziranja NES-a (Predsjedništvo, Izvršni odbor).

U klubu poslanika, odnosno vijećnika/odbornika NES-a, pretresaju se sva pitanja koja su na dnevnom redu predstavničkog tijela radi zauzimanja zajedničkog stava i dogovaraju aktivnosti koje će se poduzimati u predstavničkom tijelu ili u vezi sa radom predstavničkog tijela.

Član 65.

Odluke i stavovi Kluba poslanika NES-a i kluba vijećnika/odbornika NES-a obavezuju članove kluba u predstavničkom tijelu.

Nepoštivanje odluka i stavova Kluba podliježe odgovornosti.

VI. IZBORI I RAD ORGANA NES-a

Član 66.

Izbori u NES-u mogu biti redovni i vanredni.

Redovni izbori za sve organe i tijela na svim nivoima NES-a održavaju se svake četiri godine.

Odluku o raspisivanju redovnih izbora donijet će Glavni odbor istovremeno sa Odlukom o sazivanju redovne Konvencije NES-a.

Odluka o raspisivanju redovnih izbora sadrži:

- vrijeme održavanja izbora na svim nivoima sa rokovima za provođenje pojedinih izbornih radnji,
- imenovanje Apelacione komisije i Izborne komisije NES-a,
- imenovanje odbora za pripremu Konvencije,
- druga pitanja po potrebi.

Izborne komisije iz prethodnog člana imenuju se na period od četiri godine.

Član 67.

Vanredni izbori provode se na način i po proceduri kao i redovni izbori, a mogu se raspisati u skladu sa Pravilima izbornog postupka.

Odluku o raspisivanju vanrednih izbora za cijeli NES donijet će Glavni odbor, sa 2/3 glasova od ukupnog broja njegovih članova sazivanjem vanredne Konvencije NES-a.

Odluku o raspisivanju vanrednih izbora za niže organe NES-a donijet će taj organ, sa 2/3 glasova od ukupnog broja njegovih članova.

Vanredni izbori u nižim organima NES-a provode se i nakon uvođenja povjereništva u tom organu, a u skladu sa Statutom i Pravilima izbornog postupka.

Mandat izabranih organa i funkcionera na vanrednim izborima, u skladu s odredbama ovog člana, traje do potvrđivanja rezultata sljedećih redovnih izbora.

Izbori za sve organe i funkcionere u NES-u provode se tajnim glasanjem između više kandidata ili, u slučajevima kada je ovim Statutom predviđeno, glasanjem o listi u cjelini (ZA LISTU ili PROTIV LISTE).

Izbori se provode po jedinstvenom izbornom postupku propisanom izbornim pravilima.

Pravila izbornog postupka u NES-u donosi Glavni odbor, na prijedlog Predsjedništva.

Pravilima se može predvidjeti da se za neke organe glasa javno.

Član 68.

Svi kandidati za organe i funkcije u NES-u, kao i kandidati NES-a za funkcije u državnim i drugim organima i institucijama, moraju uživati ugled u sredini gdje žive i rade, i ispoljavati odanost programskim načelima i ciljevima NES-a.

Član 69.

Svi članovi organa NES-a i svi izabrani nosioci funkcija u njoj odgovaraju za svoj rad i mogu biti opozvani, odnosno razriješeni.

Opoziv se vrši po istom postupku kao i izbor.

U slučaju kada je organ, predsjednik ili član organa NES-a bilo kojeg nivoa, po mišljenju predlagača, izgubio povjerenje biračkog tijela zbog grešaka u radu ili stanja u oblasti za koju odgovara, može se provesti postupak provjere povjerenja.

Pravilima izbornog postupka bliže će se regulirati opoziv i provjera povjerenja u Savezu.

Član 70.

Član ili aktivista NES-a koji djeluju suprotno Programu, Statutu i drugim općim aktima NES-a i time bitno narušavaju ugled ili nanose štetu Savezu, mogu se izreći mjere odgovornosti i to:

- javni ukor,
- ukor pred isključenje iz organa NES-a,
- isključenje iz organa NES-a.

Postupak utvrđivanja odgovornosti je hitan, a provode ga odgovarajući organi u skladu sa ovim Statutom.

Za provođenje prethodnog ili određenih faza postupka za utvrđivanje odgovornosti, organ nadležan za vođenje postupka i izricanje mjera odgovornosti može imenovati posebne komisije kao pomoćna tijela, ali bez prava na donošenje same odluke.

Član 71.

Ukoliko bi daljnji rad i prisustvo u organima NES-a člana protiv koga je pokrenut postupak odgovornosti u NES-u mogli nanijeti štetu NES-u, može mu se i prije okončanja postupka izreći suspenzija (udaljenje iz organa), koja vrijedi do donošenja konačne odluke.

Član 72.

Odluke organa NES-a obavezne su za članstvo NES-a.

Odluke organa višeg nivoa organiziranja NES-a obavezne su za organe NES-a nižeg nivoa organiziranja.

Član 73.

Mandat izabranih organa NES-a traje četiri godine.

Član 74.

Svaki organ NES-a može zasjedati i odlučivati kada je na sjednici prisutno više od polovine ukupnog broja njegovih članova, osim za slučaj iz ovog Statuta kada je za rad i odlučivanje dovoljna većina prisutnih članova Glavnog odbora.

Odluke se donose većinom glasova prisutnih članova, ako Statutom ili drugim općim aktom nije drukčije određeno.

Kada organi NES-a zasjedaju u funkciji izbornog tijela, odluke se donose u skladu sa Pravilima izbornog postupka.

Član 75.

Članovi neposredno viših predstavničkih organa NES-a (Glavni odbor, Regionalni odbor itd.) učestvuju u radu neposredno nižih predstavničkih organa NES-a, a ovi su ih o svojim zasjedanjima dužni redovno i blagovremeno obavještavati.

Članovi organa iz prethodnog stava dužni su organima i članstvu NES-a sa područja iz kojega su izabrani omogućiti uvid u svoj rad, informirati ih o radu i stavovima viših organa, te u njima podnositi inicijative i prijedloge koji će odražavati interese tog područja.

Član 76.

Svi organi NES-a, i na svim nivoima, donijet će poslovnike o radu u kojima će, u skladu sa ovim Statutom, urediti pravila svog rada.

Član 77.

Predsjednik NES-a ima pravo zaustaviti izvršenje odluke i/ili druge akte organa NES-a na nižim nivoima, te odluke nosilaca funkcija u organima NES-a, za koje smatra da su u suprotnosti sa Programom, Statutom i drugim odlukama organa NES-a čija bi primjena nanijela štetu ugledu i/li drugu štetu NES-u.

U ovim slučajevima predsjednik je dužan bez odlaganja izvijestiti Predsjedništvo NES-a koje je odluku o tome dužno donijeti u roku od 30 dana od dana prijema obavijesti.

VII - KANDIDATSKE LISTE

Član 78.

Kandidate za kandidatsku listu za gradsko/općinsko vijeće odnosno Skupštinu grada/općine predlažu mjesni odbori.

Broj predloženih kandidata mjesnog odbora zavisi od ostvarenog izbornog rezultata sa prethodnih izbora za svaki mjesni odbor i taj broj za svaki mjesni odbor za lokalne izbore utvrđuje predsjednik gradske/općinske organizacije i predlaže Predsjedništvu na dalje odlučivanje.

Odluke Predsjedništva stranke o kandidatima na izbornim listama su konačne i obvezujuće.

Kandidate za kandidatsku listu Načelnika i Gradonačelnika predlaže Gradski/općinski odbor.

Kandidate za kandidatsku listu za kantonalni nivo predlažu Gradski / općinski odbori iz tog kantona. Broj predloženih kandidata Gradskog/općinskog odbora zavisi od ostvarenog izbornog rezultata sa prethodnih izbora za svaki Gradski/općinski odbori i taj broj za svaki Gradski/općinski odbor za opće izbore utvrđuje Generalni sekretar NES-a.

Kandidate za kandidatsku listu za entitetski nivo predlažu Gradski/općinski odbori za izbornu jedinicu u kojoj se nalaze.

Broj predloženih kandidata Gradskog/općinskog odbora zavisi od ostvarenog izbornog rezultata sa prethodnih izbora za svaki Gradski/općinski odbor i taj broj za svaki Gradski/općinski odbor za opće izbore utvrđuje Generalni sekretar NES-a.

Kandidate za kandidatsku listu za državni nivo predlaže Glavni odbor na osnovu usaglašenih prijedloga regionalnog odbora.

Kandidate za člana Predsjedništva BiH predlaže Predsjedništvo NES-a .

Redosljed na kompenzacijskim listama , za nivoe koji imaju kompenzacijske liste, utvrđuje Predsjedništvo stranke.

Procedure za izbor kandidata na kandidatske liste svih nivoa utvrđuju se Pravilnikom o kandidiranju i vođenju kadrovske politike kojeg donosi i usvaja Predsjedništvo stranke.

VIII. MATERIJALNO - FINANSIJSKO POSLOVANJE

Član 79.

NES ostvaruje prihode iz:

- članarina;
- priloga pravnih i fizičkih lica;
- prihoda od imovine u vlasništvu NES-a,
- budžeta BiH za finansiranje parlamentarnih grupa kao i iz entitetskih budžeta i svih njihovih nižih jedinica u skladu sa entitetskim zakonima;
- dobiti od prihoda preduzeća u vlasništvu NES-a.

Član 80.

Finansijsko poslovanje NES-a obavlja se putem transakcijskih računa i blagajne.

Primitak i izdatak sredstava može se izvršiti samo na osnovu urednih pisanih naloga, snabdjevenih potpunom dokumentacijom.

Svaka promjena mora biti odmah evidentirana u knjigovodstvu u skladu sa zakonom i računovodstvenim standardima.

Finansijsko poslovanje NES-a uređuje se posebnim Pravilnikom.

Član 81.

Niže organizacione jedinice mogu stvarati obaveze u pravnom prometu sa trećim licima samo u okviru finansijskog plana odobrenog od Predsjedništva NES-a i u skladu sa važećim propisima.

Član 82.

NES može, radi ostvarivanja dobiti, u skladu sa Zakonom, osnivati privredna društva i druge organizacije.

Odluku o osnivanju društva donosi Predsjedništvo NES-a.

Ukoliko je zakonom dopušteno, Predsjedništvo NES-a može dati saglasnost organima nižih organizacionih jedinica NES-a da osnivaju privredna društva.

Predsjedništvo NES-a odnosno odgovarajući organ nižih organizacionih jedinica NES-a, će najmanje jedanput godišnje razmatrati informaciju o poslovanju privrednog društva.

VIII. PRESTANAK RADA SAVEZA

Član 83.

NES će prestati sa radom ako to odluči Konvencija.

Za tu odluku potrebna je dvotrećinska većina glasova prisutnih članova Konvencije.

Glasanje se provodi tajno.

Član 84.

Odlukom o prestanku rada NES-a istodobno se odlučuje i o imovini NES-a, koja se može odrediti samo u korist dobrotvorne, kulturne ili vjerske ustanove.

IX. PRELAZNE I ZAVRŠNE ODREDBE

Član 85.

Izabrani članovi organa NES-a i funkcioneri NES-a, na svim nivoima, nakon izbora daju svečanu izjavu.

Tekst svečane izjave i druga pitanja u vezi s tim utvrdit će Glavni odbor odlukom.

Član 86.

Izmjene i dopune Statuta NES-a vrše se po proceduri propisanoj za njegovo donošenje.

Izuzetno, između dva zasjedanja Konvencija, Glavni odbor NES-a može statutarnom odlukom izvršiti izmjene i/ili dopune ovog Statuta ako se one ne tiču osnovnih pitanja organizacije i ciljeva NES-a.

Statutarna odluka se donosi dvotrećinskom većinom glasova ukupnog broja članova Glavnog odbora.

O donošenju odluke iz prethodnog stava Glavni odbor će izvijestiti Konvenciju NES-a na prvom zasjedanju.

Član 87.

Na osnivačkoj skupštini izabraće se rukovodstvo NES-a u skladu sa odredbama ovog statuta i osnivačke odluke.

Član 88.

Ovaj Statut stupa na snagu danom usvajanja na osnivačkoj Skupštini.

Član 89.

Svi organi NES-a usaglasice svoju organizaciju sa odredbama ovog Statuta u roku od 90 dana od njegovog stupanja na snagu.

Sarajevo, 27.02.2021.god

Predsjedavajući osnivačke skupštine
